

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj 7/10 i 3/23), člana 3. stav (3) Uredbe o osnivanju Ureda za borbu protiv korupcije Zeničko-dobojskog kantona („Službene novine Zeničko-dobojskog kantona“, broj: 5/22), na prijedlog Ureda za borbu protiv korupcije, Vlada Zeničko-dobojskog kantona, na 36. sjednici, održanoj dana 19.09.2023. godine, d o n o s i

ODLUKU

o Registru zaposlenih u javnom sektoru

Zeničko-dobojskog kantona

DIO PRVI - OPĆE ODREDBE

Član 1.

(Predmet regulisanja)

Ovom odlukom bliže se propisuje vođenje Registra zaposlenih u javnom sektoru Zeničko-dobojskog kantona (u daljem tekstu: Registar), njegov sadržaj, obaveza unosa podataka i rokovi, vođenje i upravljanje Registrom, pristup podacima, vremenski period korištenja podataka, odgovornost za autentičnost i tačnost podataka i uređuju druga pitanja koja se odnose na Registar.

Član 2.

(Primjena Odluke)

Ovu odluku dužni su primjenjivati svi organi uprave, upravne organizacije i službe, zavodi, agencije, direkcije, pravna lica s javnim ovlaštenjima Zeničko-dobojskog kantona (u daljem tekstu: Kanton), javne ustanove i javna preduzeća čiji je osnivač Kanton, te privredna društva u kojima Kanton učestvuje kao osnivač ili ima osnivačka prava sa procentom učešća od 50% (u daljem tekstu: organi i institucije).

Član 3.

(Definicije)

(1) Registar je jedinstvena evidencija podataka o zaposlenim licima na neodređeno i određeno vrijeme u organima i institucijama, koji se vodi u elektronskom obliku.

(2) Registar služi uspostavi transparentnog, centralizovanog, kvalitetnog i učinkovitog sistema upravljanja ljudskim potencijalima u javnom sektoru Kantona, u svrhu jačanja integriteta i transparentnosti u organima javne uprave, institucijama, javnim preduzećima, ustanovama, zavodima i fondovima, kao i praćenja mogućih pojava sukoba interesa u obavljanju javnih ili drugih funkcija.

Član 4.

(Rodna neutralnost izraza)

Riječi i pojmovi koji imaju rodno značenje korišteni u ovoj odluci odnose se jednako na muški i ženski rod, bez obzira jesu li korišteni u muškom ili ženskom rodu.

DIO DRUGI - SADRŽAJ I VOĐENJE REGISTRA

Član 5.

(Uspostava Registra)

Ured za borbu protiv korupcije Zeničko-dobojskog kantona (u daljem tekstu: Ured) uspostavlja i vodi Registar.

Član 6.

(Sadržaj podataka u Registru)

(1) Svi organi i institucije Uredu dostavljaju sljedeće podatke o zaposlenim licima:

- a) ime i prezime,
- b) naziv i sjedište organa uprave/institucije u kojem je lice zaposleno,
- c) naziv radnog mjesta,
- d) stručna sprema za radno mjesto,
- e) stručna sprema lica,
- f) zvanje lica,
- g) datum zasnivanja radnog odnosa na neodređeno vrijeme,
- h) datum prestanka radnog odnosa na neodređeno vrijeme,
- i) datum zasnivanja radnog odnosa na određeno vrijeme,
- j) datum prestanka radnog odnosa na određeno vrijeme,
- k) osnovna plata lica.

(2) Dostava podataka za Registar vrši se na osnovu raspoloživih isprava o zaposlenim licima i ostale dokumentacije koja se posjeduje, a što je odgovornost organa i institucija.

Član 7.

(Obaveza unosa podataka)

(1) Podatke o zaposlenim licima u Registar unose uposlenici Ureda, koji imaju posebne korisničke šifre za unos, u skladu sa odredbama ove odluke i na način predviđen Odlukom.

(2) Organi i institucije dužni su imenovati ovlaštene i odgovorne osobe za dostavu podataka za Registar i praćenje njihove tačnosti, u roku od 30 dana od dana stupanja na snagu ove odluke.

(3) Podatke o zaposlenim licima organi i institucije u roku 60 dana od dana donošenja obrasca iz člana 8. stav (1) ove odluke dostavljaju Uredu radi unosa (evidentiranja) u Registar, a potom sukcesivno, sve do uspostave neposrednog načina unosa podataka o zaposlenim licima.

(4) Nakon potpune uspostave neposrednog načina unosa podataka, ovlaštenim licima iz stava (2) ovog člana dodjeljuju se posebne korisničke šifre za neposredan unos podataka u Registar.

(5) Kod organa i institucija gdje se centralizovano vode podaci o zaposlenim licima u drugom organu, taj organ imenuje ovlaštene osobe za dostavu i unos podataka u Registar.

Član 8.

(Blagovremenost podataka)

(1) Početnu dostavu podataka Uredu o svim zaposlenim licima, organi i institucije vrše na obrascu koji donosi Sekretar Ureda, u roku 30 dana od dana donošenja tehničke dokumentacije.

(2) U slučaju novog zapošljavanja, organi i institucije dužni su za Registar dostaviti podatke o novozaposlenom licu u roku od 15 dana od dana zasnivanja radnog odnosa, odnosno nakon uspostave neposrednog načina unosa, u istim rokovima unijeti potrebne podatke u Registar.

(3) U slučaju prestanka radnog odnosa organi i institucije dužni su za Registar dostaviti podatke o nastalim izmjenama u roku od 15 dana, odnosno nakon uspostave neposrednog načina unosa, u istim rokovima unijeti potrebne podatke u Registar.

(4) Nastale promjene podataka iz člana 6. ove odluke, lice ovlašteno za unos podataka dužno je dostaviti podatke za unos u Registar u roku od 15 dana od dana izvršene promjene, odnosno nakon uspostave neposrednog načina unosa, te u datim rokovima unijeti podatke u Registar.

(5) Lica iz člana 7. stav (2) Odluke odgovorna su za blagovremenu dostavu podataka.

Član 9.

(Vođenje Registra)

(1) Na osnovu podataka organa i institucija, Ured formira jedinstvenu bazu podataka o zaposlenim licima u javnom sektoru Kantona, objedinjujući podatke primjenom odgovarajućih

parametara.

(2) Tehničko uputstvo za unos podataka u Registar izrađuje Ured i čini ga dostupnim putem informacionog ili drugog sistema Ureda.

Član 10.

(Upravljanje Registrom)

(1) Ured, nakon uspostave Registra, upravlja njegovim daljnjim razvojem u smislu uvođenja informacione podrške funkcijama upravljanja ljudskim potencijalima, centralizovanja podataka i korištenja istih u zakonom i drugim relevantnim propisima predviđene svrhe.

(2) Praćenje rokova za unos podataka i reagovanje prema organima i institucijama u slučaju nepoštivanja odredbi ove odluke u bilo kom segmentu u nadležnosti je Ureda.

DIO TREĆI - KORIŠTENJE I ČUVANJE PODATAKA

Član 11.

(Čuvanje i korištenje podataka)

(1) Ured vrši objedinjavanje svih podataka koje unose organi i institucije i javno objavljuje na web stranici www.zdk.ba ili za ove svrhe zakupljenoj posebnoj domeni.

(2) Podaci koje u Registar unose ovlaštene osobe Ureda i organa i institucija čuvaju se i štite u skladu sa propisima koji regulišu oblast zaštite ličnih podataka.

Član 12.

(Vremenski period korištenja)

Podaci o zaposlenim licima evidentiraju se i čine dostupnim javnosti za vrijeme trajanja radnog odnosa, a brišu se godinu dana nakon prestanka radnog odnosa.

Član 13.

(Autentičnost i tačnost unesenih podataka)

(1) Za autentičnost i tačnost dostavljenih, odnosno nakon uspostave neposrednog načina unosa, unesenih podataka u Registar odgovorni su organi i institucije.

(2) O pogrešno dostavljenim podacima za unos u Registar, ovlaštena lica iz člana 7. stav (2) dužna su obavijestiti Ured u roku od 7 dana od dana saznanja, odnosno nakon uspostave neposrednog načina unosa, u istom roku ispraviti pogreške ili netačno unesene podatke.

Član 14.

(Osiguranje uslova za vođenje Registra)

Rukovodilac organa i institucije odgovoran je za osiguranje potrebnih kadrovskih i tehničkih uslova za dostavu podataka iz člana 6. stav (1) Uredu, a nakon uspostave neposrednog načina unosa podataka o zaposlenim licima od ovlaštenih osoba organa i institucija i za unos u Registar.

DIO ČETVRTI - PRELAZNE I ZAVRŠNE ODREDE

Član 15.

(Tehničke i normative pretpostavke realizacije Odluke)

Sekretar Ureda u roku od 60 dana od dana stupanja na snagu ove odluke donosi tehničku dokumentaciju.

Član 16.

(Nadzor nad primjenom Odluke)

(1) Nepostupanje u skladu sa odredbama ove odluke predstavlja povredu službene dužnosti, odnosno povredu radne obaveze.

(2) Nadzor nad primjenom ove odluke vrši Ured.

Član 17.

(Provođenje Odluke u jedinicama lokalne samouprave)

(1) Preporučuje se općinama i gradovima na teritoriji Kantona da pristupe ovoj odluci, radi uspostave transparentnog, centralizovanog, kvalitetnog i učinkovitog sistema smanjenja rizika u upravljanju ljudskim potencijalima u javnom sektoru na teritoriji Kantona.

(2) Pristupanje se vrši donošenjem odluke od strane načelnika, odnosno gradonačelnika, koja sadrži ovlaštenje Uredu za obradu podataka koji su predmet ove odluke, a koja se dostavlja Uredu.

Član 18.

(Stupanje na snagu Odluke)

Ova odluka stupa na snagu osmog dana od dana objavljivanja u „Službenim novinama Zeničko-dobojskog kantona“.

PREMIJER

Amra Mehmedić

Broj: 02-04-14357/23

Datum, 19.09.2023. godine

Z e n i c a

DOSTAVLJENO:

1x Ured za borbu protiv korupcije,

1x Svim kantonalnim ministarstvima i drugim tijelima kantonalne uprave,

1x Svim institucijama, putem resornih ministarstava,

1x svim jedinicama lokalne samouprave u Zeničko-dobojskom kantonu,
putem Ureda,

1x Stručna služba Vlade – web stranica Zeničko-dobojskog kantona,

1x „Službene novine Zeničko-dobojskog kantona“,

1x a/a.